

## PENTAKLIFAN IBADAT TERHADAP PENGIDAP AUTISME MENURUT FIQH ISLAM

Syed Sultan Bee bt. Packer Mohamed  
*Universiti Utara Malaysia*  
*ss.bee@uum.edu.my*

### ABSTRAK

Autisme ialah gangguan perkembangan neuro sepanjang hayat. Ini bermakna autisme memberi kesan kepada perkembangan otak dan mempengaruhi keupayaan kanak-kanak untuk berkomunikasi, berinteraksi secara sosial dan belajar seperti kanak-kanak biasa. Namun begitu, tahap gangguan ini adalah berbeza di antara satu individu dengan individu lain. Dari sudut perubatan, pengidap autisme dikategorikan kepada tiga tahap iaitu ringan, sederhana dan teruk. Rentetan itu, satu kajian perlu dijalankan untuk mengenalpasti hukum pentaklifan syara' terhadap pengidap autisme dalam ibadat kerana ia melibatkan hak Allah SWT. Justeru, kajian ini bertujuan untuk mengenalpasti pengkategorian pengidap autisme menurut fiqh Islam serta mengkaji hukum pentaklifan syara' ke atas setiap kategori dalam ibadat. Sehubungan itu, kajian yang berbentuk kualitatif ini menggunakan kaedah kepustakaan untuk mengumpul data. Manakala kaedah analisis kandungan digunakan untuk menganalisis data yang terkumpul. Hasil kajian mendapati bahawa pengidap autisme yang berada pada tahap ringan merupakan mukallaf. Oleh itu, wajib ke atas mereka menunaikan semua ibadat wajib yang diperintahkan ke atas mereka. Manakala pengidap autisme yang berada pada tahap sederhana dan teruk bukan merupakan mukallaf. Oleh itu, tidak wajib ke atas mereka sebarang ibadat. Walaupun begitu, mereka masih lagi perlu diajar dan dilatih untuk menunaikan ibadat. Tanggungjawab ini perlulah diambil oleh wali sama ada ibu bapa atau penjaga mereka.

**Kata kunci:** Pentaklifan Ibadat, Pengidap autisme, Tanggungjawab wali.

### 1. PENGENALAN

Autisme berasal daripada perkataan bahasa Greek iaitu 'autos' yang bermaksud sendiri. Dalam konteks ini, ia merujuk kepada seseorang yang hidup dalam dunianya sendiri. Dari sudut perubatan, autisme ialah keadaan di mana interaksi sosial seseorang terganggu akibat masalah kemahiran berkomunikasi, tingkah laku tidak wajar yang berulang, pemencilan diri serta mempunyai keinginan terhad terhadap sesuatu benda.

Rentetan itu, perlu diketahui hukum pentaklifan syara' terhadap pengidap autisme terutamanya dalam ibadat kerana ia melibatkan hak Allah SWT. Sekiranya mereka termasuk dalam golongan mukallaf, mereka tidak terlepas daripada melakukan semua ibadat wajib. Sebaliknya, sekiranya mereka tidak termasuk dalam golongan mukallaf, mereka masih lagi perlu diajar dan dilatih untuk melakukan ibadat dan tanggungjawab ini terpikul di atas bahu para wali.

Bertitik tolak daripada itu, kajian ini dijalankan untuk mengenalpasti pengkategorian pengidap autisme menurut fiqh Islam serta mengkaji hukum pentaklifan syara' ke atas setiap kategori dalam ibadat. Hasil penelitian terhadap kajian lepas mengenai autisme mendapati masih kurang kajian yang

menjurus kepada pentaklifen syara' terhadap golongan ini terutamanya dalam ibadat. Kebanyakan kajian tertumpu kepada masalah yang dihadapi oleh pengidap autisme dan kaedah menanganinya dari sudut komunikasi, interaksi sosial, pembelajaran dan kesalahan seksual.

Kajian ini diharapkan dapat memberi kesedaran kepada para wali yang memiliki anak yang mengidap autisme agar mengambil berat tentang status anak mereka sama ada mereka termasuk dalam golongan mukallaf atau bukan mukallaf. Begitu juga, mereka perlu menitikberatkan tentang ibadat anak mereka walaupun mereka tidak termasuk dalam golongan bukan mukallaf.

## **2. METODOLOGI KAJIAN**

Kajian ini berbentuk kualitatif dengan menggunakan kaedah kepustakaan yang terdiri daripada buku dan jurnal untuk mengumpul data. Bagi tujuan analisis pula, kaedah analisis kandungan digunakan.

## **3. DAPATAN KAJIAN DAN PERBINCANGAN**

Dapatan kajian dibincang seperti berikut:

### **3.1. Tahap Autisme**

Menurut *American Psychiatric Association* (2013) dalam *Diagnostic and Statistical Manual of Mental Disorders (DSM-5)*, autisme boleh dikategorikan kepada tiga tahap iaitu:

#### **1) Tahap Satu (Ringan)**

Pengidap autisme tahap satu mempunyai simptom yang lebih ringan di mana mereka mempunyai gangguan yang minimum terhadap aktiviti-aktiviti dalam kehidupan seharian mereka. Umumnya, pengidap autisme tahap satu memerlukan sokongan berbentuk komunikasi dan interaksi sosial. Tanpa sokongan dan bantuan, mereka akan memperlihatkan masalah yang ketara dalam komunikasi sosial.

#### **2) Tahap Dua (Sederhana)**

Pengidap autisme tahap dua memerlukan sokongan besar yang lebih banyak daripada mereka yang berada pada tahap satu. Ini kerana biasanya golongan ini mengalami masalah yang lebih jelas terhadap komunikasi lisan dan sosial. Di samping itu, mereka juga mempunyai minat yang sangat sempit dan terlibat dalam tingkah laku berulang yang boleh menyukarkan mereka untuk berfungsi atau mengambil bahagian dalam situasi tertentu. Gangguan dapat dilihat dengan jelas walaupun diberikan sokongan dan bantuan.

#### **3) Tahap 3 (Teruk)**

Pengidap autisme tahap tiga memerlukan sokongan yang sangat besar dalam komunikasi dan interaksi sosial. Mereka mengalami defisit teruk dalam komunikasi lisan dan bukan lisan, sukar untuk melibatkan diri dengan orang lain dan mempunyai minat yang terhad dalam interaksi sosial. Pengidap autisme pada tahap ini sering menghadapi cabaran yang ketara dalam fungsi eksekutif, penjagaan diri dan kemahiran hidup harian.

### 3.2. Pengkategorian Pengidap Autisme Menurut Fiqh Islam

Pengidap autisme dikategorikan kepada tiga kategori seperti berikut (al-Sayyid Habsyi, 2019):

- 1. Pengidap autisme tahap satu (ringan dan memerlukan sokongan)**  
Golongan ini mempunyai kecerdasan akal yang sempurna sama seperti orang yang normal. Oleh itu, mereka memiliki tahap kemampuan untuk memahami sesuatu perkara dan tahap *tamyiz* mereka (kemampuan untuk membezakan antara perkara yang baik dan buruk) yang baik. Dari sudut fiqh Islam, ciri-ciri ini adalah sepadan dengan ciri-ciri seorang yang berakal. Justeru, golongan ini termasuk dalam kumpulan orang yang berakal (al-Sarkhasi, t.t.).
- 2. Pengidap autisme tahap dua (sederhana dan memerlukan sokongan besar)**  
Golongan ini mempunyai tahap kecerdasan akal yang lemah. Oleh itu, mereka memiliki tahap kemampuan untuk memahami sesuatu perkara dan tahap *tamyiz* (kemampuan untuk membezakan antara perkara yang baik dan buruk) yang lemah. Dari sudut fiqh Islam, ciri-ciri ini adalah sepadan dengan ciri-ciri seorang *ma'tuh mumayyiz*. Justeru, golongan ini termasuk dalam kumpulan *ma'tuh mumayyiz* (al-Namlah, 1999).
- 3. Pengidap autisme tahap tiga (teruk dan memerlukan sokongan sangat besar)**  
Golongan ini mempunyai tahap kecerdasan akal yang sangat lemah. Oleh itu, mereka tidak memiliki kemampuan untuk memahami sesuatu perkara dan tidak memiliki kemampuan *tamyiz* (kemampuan untuk membezakan antara perkara yang baik dan buruk). Dari sudut fiqh Islam, ciri-ciri tersebut adalah sepadan dengan ciri-ciri seorang *ma'tuh ghair mumayyiz*. Justeru, golongan ini termasuk dalam kumpulan *ma'tuh ghair mumayyiz* (Zaidan, 1987).

### 3.3. Pentaklifan Syara' Terhadap Pengidap Autisme

Pentaklifan syara' terhadap pengidap autisme dikupas seperti berikut:

#### 3.3.1. Definisi Taklif dan Mukallaf

Taklif ialah sesuatu pertanggungjawaban kesan daripada perintah syara' (al-Mirdawi, 2013).

Manakala mukallaf pula ialah seseorang yang perbuatannya tertakluk kepada hukum Allah SWT (al-Zuhaili, 2006).

#### 3.3.2. Pentaklifan Ibadat Terhadap Pengidap Autisme

Pengidap autisme tahap satu diqiyaskan dengan mukallaf yang baligh dan berakal kerana keduanya mempunyai kemampuan untuk memahami nas dan melaksanakan isi yang terkandung dalam nas dengan sempurna. Justeru, dikenakan ke atas golongan ini semua hukum yang dikenakan ke atas mukallaf dan tidak terangkat segala bentuk pentaklifan daripada mereka (al-Ghazali, 1993). Sehubungan itu, semua ibadat wajib seperti solat fardhu lima kali sehari semalam, puasa bulan Ramadhan, zakat jika memenuhi semua syaratnya serta haji jika mampu adalah wajib ke atas golongan ini. Oleh itu, pihak wali sama ada ibu bapa atau penjaga wajib mengajar, menyuruh serta memastikan anak mereka

Pengidap autisme tahap dua diqiyaskan dengan *ma'tuh mumayyiz* kerana kedua-duanya tidak mempunyai kemampuan yang sempurna untuk memahami nas dan melaksanakan isi yang terkandung dalam nas. Justeru, dikenakan ke atas golongan ini semua hukum yang dikenakan ke atas *ma'tuh mumayyiz* dan sekaligus tidak dikira sebagai mukallaf. Justeru, terangkat daripada mereka segala bentuk pentaklifan (Zaidan, 1987). Sehubungan itu, semua ibadat wajib tidak diwajibkan ke atas golongan ini.

Namun begitu, pihak wali sama ada ibu bapa atau penjaga wajib mengajar dan menyuruh mereka menunaikan solat dan puasa wajib. Ini kerana hukum *ma'tuh mumayyiz* adalah sama seperti kanak-kanak *mumayyiz*. Jika mereka enggan menunaikan ibadat tersebut, harus bagi wali memukul mereka dengan tujuan mendidik (al-Nawawi, t.t.). Hukum ini adalah berdasarkan sabda Rasulullah SAW yang bermaksud:

*“Perintahkanlah anak-anak kamu untuk mengerjakan solat ketika mereka telah sempurna mencapai umur tujuh tahun. Dan pukullah mereka sekiranya mereka meninggalkan solat ketika mereka telah sempurna mencapai umur sepuluh tahun. Dan asingkanlah tempat tidur mereka”.*

(Sunan Abu Daud, no hadis: 495)

Pengidap autisme tahap tiga diqiyaskan dengan *ma'tuh ghair mumayyiz* kerana kedua-duanya tidak mempunyai kemampuan untuk memahami nas dan tidak mampu melaksanakan isi yang terkandung dalam nas. Justeru, dikenakan ke atas golongan ini semua hukum yang dikenakan ke atas *ma'tuh ghair mumayyiz* dan sekaligus tidak dikira sebagai mukallaf. Justeru, terangkat daripada mereka segala bentuk pentaklifan (Zaidan, 1987). Sehubungan itu, semua ibadat wajib tidak diwajibkan ke atas golongan ini seperti pengidap autisme tahap dua. Namun begitu, pihak wali sama ada ibu bapa atau penjaga boleh mengajar mereka menunaikan solat wajib dan mereka tidak perlu disuruh untuk menunaikan solat tersebut (al-Nawawi, t.t.).

Di samping itu, walaupun pengidap autisme tahap dua dan tiga tidak wajib ke atas mereka sebarang ibadat wajib, akan tetapi pihak wali wajib membayar zakat daripada harta mereka sekiranya telah memenuhi syaratnya (al-Zuhaili, 2006).

Lanjutan itu, pengidap autisme tahap satu yang mempunyai akal yang sempurna, tidak semestinya berada pada tahap satu setiap masa. Mereka kadang kala boleh bertindak seperti pengidap yang berada pada tahap dua dan tiga. Dalam keadaan ini, terangkat daripada mereka segala bentuk pentaklifan termasuk ibadat. Mereka hanya dikira sebagai mukallaf dan dikenakan pentaklifan ke atas mereka apabila mereka kembali kepada tahap satu (al-Sayyid Habsyi, 2019).

Seterusnya, dalil yang menunjukkan bahawa golongan *ma'tuh* sama ada *mumayyiz* atau *ghair mumayyiz* bukan mukallaf ialah sabda Rasulullah SAW yang bermaksud:

*“Diangkat pena daripada tiga golongan: Orang yang tidur sehingga dia bangun, daripada kanak-kanak sehingga dia baligh dan daripada orang yang cacat mental sehingga dia berakal”.*

(Sunan al-Tirmizi, no: 1423)

#### 4. KESIMPULAN

Pengidap autisme tahap satu dikira sebagai mukallaf. Manakala pengidap autisme tahap dua dan tiga tidak dikira sebagai mukallaf. Justeru, wajib ke atas pengidap autisme tahap satu menunaikan semua ibadat wajib. Walau bagaimanapun, pengidap autisme tahap dua dan tiga tidak diwajibkan ke atas mereka sebarang ibadat. Namun, wali perlu mengajar dan melatih mereka untuk melalukan ibadat.

#### RUJUKAN

Abu Daud, Sulaiman bin al-Asy'ath al-Azdi al-Sajastani, (2009). Sunan Abi Daud, 1,133, Dar al-Risalah al-'Alamiyyah, Beirut.

Al-Ghazali, Abu Hamid Muhammad bin Muhammad, (1993). Al-Mustasfa, 67, Dar al-Kutub al-'Imiyyah, Beirut.

Al-Mirdawi, Ali, (2013). Tahrir al-Manqul wa Tahzib al-Uşul, 125, Wizarat al-Awqaf wa Syuun al-Islamiyyat, Qatar.

Al-Namlah, Abdul Karim bin Ali bin Muhammad, (1999). Al-Muhazzab fi 'Ilm Usul al-Fiqh al-Muqaran, 1,335, Maktabah al-Rushd, al-Riyadh.

Al-Nawawi, Abu Zakariyya Muhiyuddin bin Syaraf, (t.t.). Al-Majmu' Syarh Al-Muhazzab, 3,11, Dar al-Fikr, Damsyik.

Al-Sarkhasi, Abu Bakr Muhammad bin Ahmad bin Abu Sahl, (t.t.). Usul al-Sarkhasi, 348, Dar al-Ma'rifah, Beirut.

Al-Sayyid Habsyi, Iman Hamzah, (2019). Athar al-tawahhud 'ala al-ahkam al-talifiyyah fi al-syariah al-islamiyyah dirasah fiqhiyyah muqaranah, Majallah Kulliyyah al-Dirasat al-Islamiyyah wa al-'Arabiyyah lil Banat bi Damanhur, 1, 4, 1118-1120.

Al-Tirmizi, Abu Isa Muhammad bin Isa, (1998). Sunan Al-Tirmizi, 4,32, Dar al-Gharb al-Islami, Beirut.

Al-Zuhaili, Muhammad Mustafa, (2006). Al-Wajiz fi Usul al-Fiqh al-Islami, 1, 489-490, Dar al-Khayr, Damsyik.

American Psychiatric Association, (2013). Diagnostic and Statistical Manual of Mental Disorders, Fifth Edition (DSM-5), 33-36, American Psychiatric Publishing, Washington, DC.

Zaidan, Abdul Karim, (1987). Al-Wajiz fi Usul al-Fiqh, 104, Muassasah al-Risalah, Beirut.